



1. Ծանոթագրություն

- **ՀՀ կրթության և գիտության, ԱՀ կրթության, գիտության և սպորտի նախարարություններ** – Մրցույթն իրականացվում է Հայաստանում ՀՀ կրթության և գիտության, Արցախում՝ Արցախի Հանրապետության կրթության, գիտության և սպորտի նախարարությունների հովանու ներքո (www.edu.am, edu.nkr.am):
- **«Այբ» կրթական հիմնադրամ** – Բացառիկ կազմակերպիչը Հայաստանում (Երևան 0009, Կորյունի 19ա, 9-րդ հարկ, 54-37-07, meghu@ayb.am, www.meghu.am, www.ayb.am):
- **Մարզային համակարգողներ** – Մարզերում մրցույթի կազմակերպման համար «Այբ» հիմնադրամի պատասխանատուներ: Բոլոր հարցերով անմիջապես դիմեք նրանց: Համակարգողների տվյալները տրված են www.meghu.am կայքում և մրցույթի իրազեկման նյութերում:
- **Դպրոց** – «Մեղու» մրցույթին մասնակցության հայտ ներկայացրած հանրակրթական հաստատություն:
- **Միացող դպրոց** – Այն դպրոցը, որի մասնակից աշակերտների թիվը մեծ է 5-ից և պակաս է 40-ից: Նման դպրոցը մրցույթի օրը միանալու է այլ դպրոցի:
- **Դպրոցի պատասխանատու** – Դպրոցի կողմից լիազորված աշխատակից, ով կհամակարգի դպրոցում մրցույթի անցկացման հետ կապված բոլոր աշխատանքները: «Այբ»-ը և մարզային համակարգողները կապ կպահպանեն անմիջապես դպրոցի պատասխանատուի հետ:
- **Տարածքային կենտրոններ** – Կենտրոններ, որոնք գործելու են միայն մրցույթի օրը գրեթե բոլոր քաղաքային համայնքներում: Այս կենտրոններից դպրոցի պատասխանատուները առավոտյան կվերցնեն մրցութային փաթեթները և այնտեղ էլ մրցույթի ավարտից հետո կհանձնեն պատասխանների թերթիկներով փաթեթները: Տարածքային կենտրոնների ցանկը տրվում է www.meghu.am կայքում, ինչպես նաև տրամադրվում է մարզային համակարգողների կողմից:
- **Դպրոցի դիտորդներ** – Դպրոցի կողմից լիազորված անձինք (այդ թվում՝ նաև ծնողներ), ովքեր կհետևեն մրցույթի կանոնների պահպանմանն իրենց իսկ դպրոցում: Մասնակից դպրոցում պետք է ապահովվի առնվազն մեկական դիտորդի ներկայությունը յուրաքանչյուր սրահում (դասասենյակում), եթե մրցույթը դպրոցում իրականացվում է ոչ թե մեկ, այլ մի քանի սրահներում:
- **«Այբ»-ի դիտորդներ** – «Այբ» հիմնադրամի կողմից լիազորված անձինք, ովքեր մրցույթի օրը կայցելեն մի շարք դպրոցներ՝ կամայական ընտրությամբ, և կհետևեն մրցույթի կանոնների պահպանմանը:
- **Մասնակիցներ** – Դպրոցի 3-12-րդ դասարանցիներ, ովքեր մինչև հայտարարված վերջնաժամկետը գրանցվել են իրենց դպրոցի մասնակիցների ցանկում՝ ներկայացնելով վճարման անդորրագրերը:
- **Հուշանվերներ** – Մրցույթի օրը բոլոր մասնակիցներին տրվող փոքրիկ նվերներ:
- **Մրցանակներ** – Արդյունքների ամփոփումից հետո բոլոր մասնակիցներն ստանում են մասնակցության հավաստագրեր: Մրցանակակիրներին շնորհվում են խրախուսական մրցանակներ:
- **Մրցույթի մրցանակակիրներ** – Մրցույթն ունի երեք կարգի մրցանակակիր՝ *հաղթող*, *լավագույն* և *հատուկ*, որոնք որոշվում են տվյալ տարվա բոլոր մասնակիցների արդյունքների ընդհանուր հաշվետվության հիման վրա:
- **Մրցույթի մասնակցության հայտ** – Դպրոցի կողմից լրացված և մինչև հայտարարված վերջնաժամկետը «Այբ» հիմնադրամ ներկայացված հայտ: Դպրոցը կմասնակցի մրցույթին միայն նշված ժամկետում հայտը ներկայացնելու դեպքում: Հայտին պետք է պարտադիր կցվեն

մասնակիցների ցանկը և վճարման անդորրագրերը: Եթե դպրոցում մասնակիցների թիվը պակաս է 5-ից, տվյալ դպրոցը մասնակցության հայտ ներկայացնել չի կարող:

- **Մասնակիցների ցանկ** – Մասնակից երեխաների ցանկ, որը կազմվում է դպրոցում: Ցանկում ներառվում են մրցույթին մասնակցել ցանկացող բոլոր երեխաները, ովքեր ներկայացրել են մասնակցության վճարի բանկային անդորրագրերը: Մասնակիցների ցանկի տպագիր տարբերակը ներկայացվում է հայտի հետ, իսկ էլեկտրոնայինը՝ պարտադիր ուղարկվում meghu@ayb.am էլիասցեին:
- **Մրցութային փաթեթ** – Մրցույթի օրը դպրոցների պատասխանատուներին տարածքային կենտրոններից տրվող փաթեթ, որը ներառում է խնդիրների տարբերակները՝ ըստ տարիքային խմբերի, պատասխանների լրացման թերթիկները, դպրոցի մասնակից աշակերտների ցանկը, դպրոցի համար մրցութային օրվա ուղեցույցը և մասնակիցների հուշանվերները: Դպրոցի ծածկագիրը փակցված է փաթեթի վրա, իսկ դպրոցի կողմից լրացվող արձանագրությունը՝ պատասխանների թերթիկների ծրարի վրա:
- **Դպրոցի ծածկագիր** – Դպրոցին «Այբ»-ի կողմից շնորհվող թվային անփոփոխ ծածկագիր (բոլոր տարիների համար), որը կարող եք գտնել www.meghu.am կայքում կամ իմանալ մարզային համակարգողներից: Այս ծածկագիրը երեխաները պարտադիր պետք է գրեն պատասխանների լրացման իրենց թերթիկների վրա:
- **Մասնակցի հերթական համար** – Մասնակիցների վերջնական ցանկում երեխայի հերթական համարը: Փաստացի մասնակիցների վերջնական ցանկը ճշգրտվում է մրցույթի ընթացքում «Այբ»-ից ստացված ցանկի հիման վրա, և ավարտից հետո հանձնվում է տարածքային կենտրոն: Հերթական համարով և դպրոցի ծածկագրով է համակարգիչը հասկանալու, թե ում է պատկանում տվյալ աշխատանքը:

2. Մրցույթի մասնակիցները

2.1. Մրցույթի հիմնական նպատակը դպրոցականների ամենալայն շրջանում հայերենի հանդեպ հետաքրքրության խթանումն է, ուստի մրցույթին կարող են մասնակցել 3-12-րդ դասարանցի բոլոր ցանկացողները: Մրցույթի առաջադրանքների տարբերակները բաժանված են ըստ հինգ տարիքային խմբերի՝ 3-4-րդ, 5-6-րդ, 7-8-րդ, 9-10-րդ և 11-12-րդ դասարաններ: ***Որևէ նախնական ընտրություն կատարելը, որևէ երեխայի կամքին հակառակ՝ նրան մրցույթին մասնակցելուց զրկելը կամ որևէ կերպով նրա մասնակցությանը խոչընդոտելը դեմ են «Մեղու» մրցույթի սկզբունքներին և անընդունելի են:***

2.2. Ովքեր կարող են մասնակցել մրցույթին

- 3-12-րդ դասարանի աշակերտներ այն դպրոցից, որը մասնակցության հայտ է ներկայացրել և որի ցանկերում գրանցված են 40 և ավելի մասնակիցներ: Այս երեխաները մասնակցում են իրենց իսկ դպրոցում:
- 3-12-րդ դասարանի աշակերտներ այն դպրոցից, որը մասնակցության հայտ է ներկայացրել, սակայն որի ցանկերում գրանցված են 5-ից ավել և 40-ից պակաս մասնակիցներ: Այս երեխաները մասնակցում են մրցույթին այլ դպրոցում, որի հետ իրենց դպրոցը նախապես պայմանավորվում է միանալու վերաբերյալ և նշում այդ մասին մասնակցության հայտում:
- 3-12-րդ դասարանի աշակերտներ, որոնց դպրոցը մասնակցության հայտ չի ներկայացրել: Այս երեխաները կարող են իրենց նախաձեռնությամբ նախօրոք դիմել որևէ այլ դպրոցի, ստանալ այդ դպրոցի ղեկավարության թույլտվությունը, գրանցվել մասնակիցների ցանկում, տրամադրել վճարման անդորրագիրը և մրցույթի օրը ներկայանալ այդ դպրոց:

3. Մրցույթի անցկացումը

3.1. Հայաստանում և Արցախում մրցույթի բացառիկ կազմակերպիչը «Այբ» կրթական հիմնադրամն է:

- 3.2. Մրցույթի կազմակերպման աշխատանքներում ներգրավված են «Այբ» կրթական հիմնադրամը, մարզային համակարգողները և մասնակից դպրոցները: Յուրաքանչյուր մասնակից դպրոց հենց ինքն է նշանակում **դպրոցի պատասխանատուին**, ով համակարգում է մրցույթի անցկացման աշխատանքներն անմիջապես դպրոցում:
- 3.3. Մրցույթն անցկացվում է տվյալ դպրոցում, եթե գրանցված մասնակիցների թիվը 40 և ավելի է: Եթե մասնակից աշակերտների թիվը ավել է 5-ից և պակաս 40-ից, ապա դպրոցը մրցույթին մասնակցում է՝ մրցույթի օրը միանալով մեկ այլ դպրոցի, որի հետ նախապես ձեռք է բերել համապատասխան պայմանավորվածություն և նշել այդ մասին մասնակցության հայտում: **Եթե դպրոցում մասնակիցների թիվը պակաս է 5-ից, տվյալ դպրոցը մասնակցության հայտ ներկայացնել չի կարող:**
- 3.4. Յուրաքանչյուր մասնակից երեխա (անկախ մրցույթի արդյունքներից) և մասնակից դպրոց (անկախ այն բանից՝ մրցույթն իրականացվել է այդ, թե մեկ այլ դպրոցում) ստանում է **մասնակցության հավաստագիր:**
- 3.5. Դպրոցի պատասխանատուն մրցույթի մասին տեղեկացնում է աշակերտներին, գրանցում մասնակիցներին «Մասնակիցների ցանկ» հատուկ էլեկտրոնային նիշքում (file), հավաքագրում վճարման անդորրագրերը (բնօրինակները կամ պատճենները), ուղարկում «Մասնակիցների ցանկի» վերջնական տարբերակը meghu@ayb.am էլիասցեին: Այնուհետև պատասխանատուն կցում է «Մասնակիցների ցանկի» տպված տարբերակն ու վճարման անդորրագրերը դպրոցի մասնակցության հայտին և մինչև հայտարարված վերջնաժամկետը ներկայացնում «Այբ» կրթական հիմնադրամի կենտրոնական գրասենյակ, որտեղ և պատրաստվում են մրցույթի կյուբերը:
- 3.6. Մրցույթն անցկացվում է հոկտեմբեր ամսին: Հայաստանի դպրոցներում մրցույթը սկսվում է 12:00-14:00 ժամանակահատվածում: Մրցույթի օրվա առավոտյան դպրոցի պատասխանատուն տարածքային կենտրոնից վերցնում է մրցութային փաթեթը: «Այբ»-ը հայտնում է տարածքային կենտրոնների մասին մրցույթից մեկ շաբաթ առաջ: Մրցույթի առաջադրանքները տրվում են դպրոցի պատասխանատուին կնքված փակ ծրարով, որը պետք է բացվի **միայն մրցույթի մեկնարկի պահին՝ մասնակիցների ներկայությամբ:** Առաջադրանքները, պատասխանների լրացման թերթիկները և հուշանվերները պատրաստվում և դպրոցներին ուղարկվում են դպրոցի «Մրցույթի մասնակցության հայտում» նշվածից առնվազն 10%-ով ավելի քանակով՝ յուրաքանչյուր տարիքային խմբի համար: Այդ 10%-ի սահմաններում նախապես չգրանցված աշակերտները կարող են մրցույթին մասնակցել՝ մրցույթի օրը ներկայանալով դպրոց և պատասխանատուին տրամադրելով վճարման անդորրագիրը:
- 3.7. Այն դպրոցները, որոնք միավորվել են մրցույթի իրականացման համար, կստանան **մեկ (ընդհանուր) մրցութային փաթեթ**, որը կտրվի այն դպրոցի պատասխանատուին, որտեղ ֆիզիկապես իրականացվում է մրցույթը:
- 3.8. Այն դպրոցներին, որոնց տարածքային կենտրոնները գտնվում են ոչ իրենց համայնքում, կտրվի մրցութային փաթեթի ստացման ճանապարհաձախսի փոխհատուցում 3000 դրամի չափով: Փոխհատուցումը կփոխանցվի **դպրոցի բանկային հաշվեհամարին** մրցույթից հետո երկուսուկես ամսվա ընթացքում: Դպրոցն իր բանկային տվյալները (բանկի անվանումն ու հաշվեհամարը) նշում է մրցույթի օրը պատասխանների թերթիկների ծրարի վրա փակցված արձանագրության մեջ: Սխալ նշված բանկային տվյալների համար «Այբ»-ը պատասխանատուություն չի կրում:
- 3.9. Մասնակիցներին պետք է նստեցնել մեկ սրահում կամ դահլիճում: Եթե դա անհնար է, ապա երեխաներին կարելի է նստեցնել մի քանի սրահում (դասասենյակում) այնպես, որ նույն սրահում լինեն տարբեր տարիքային խմբի մասնակիցներ, իսկ յուրաքանչյուր սրահում առնվազն մեկական դիտորդ: **Հիշեցնենք, որ մրցույթի հեղինակությունն ու արդյունքների ճշտությունը կախված են մրցույթի անցկացման պատշաճությունից:**

- 3.10. Մրցույթի ժամանակ մասնակիցներին պետք է նստեցնել հնարավորինս ազատ (խիստ ցանկալի է առանձին-առանձին՝ յուրաքանչյուր սեղանի առաջ մեկ աշակերտ): Եթե դա անհնար է, ապա խորհուրդ է տրվում կողք կողքի նստեցնել տարբեր տարիքային խմբի երեխաների, ովքեր չունեն նույն առաջադրանքները: **Չի կարելի կողք կողքի նստեցնել հարակից տարիքային խմբերի երեխաների**, օրինակ՝ 7-8-րդ դասարանցիներին՝ 5-6-րդ դասարանցիների կամ 9-10-րդ դասարանցիների հետ:
- 3.11. Մրցույթի ժամանակ սեղաններին պետք է լինեն միայն «Մեղու»-ի առաջադրանքները, պատասխանների լրացման թերթիկը, գրիչ և, ցանկության դեպքում, սևագրի թերթիկ, որը պետք է լինի **մաքուր թուղթ**: Չի թույլատրվում որպես սևագիր օգտագործել տետր կամ նշատետր:
- 3.12. Մրցույթի ընթացքում **արգելվում է օգտագործել հեռախոս և հաշվողական այլ սարքեր**: Մրցույթի 75 րոպեների ընթացքում լռության պահպանումը պարտադիր է: **Հուշումները, արտագրությունները, միջամտությունները, խոսելն ու աղմկելը խստիվ արգելվում են**:
- 3.13. Մրցույթի սկզբում բոլոր մասնակիցներին բաժանվում են **հուշանվերները և պատասխանների լրացման թերթիկները**: Թերթիկի լրացման համար օգտագործել **միայն կապույտ կամ սև գրիչ**: Այլ գույնի գրիչ կամ մատիտ օգտագործել չի թույլատրվում:
- 3.14. Մրցույթի կանոնների բացատրության և պատասխանների լրացման թերթիկներում անձնական տվյալները գրանցելու համար նախատեսված մոտ 15 րոպե: Մրցույթի առաջադրանքների լուծման համար հատկացվում է ուղիղ **75 րոպե**: Այս ժամանակը հաշվարկվում է առաջադրանքների թերթիկները (թեստերը) երեխաներին բաժանելու պահից: Այսպիսով՝ մրցույթի անցկացման համար պահանջվում է մոտ 1 ժամ 30 րոպե:
- 3.15. Համոզվեք, որ բոլոր մասնակիցները գրել են անհրաժեշտ տվյալները պատասխանների լրացման թերթիկի վրա, և **միայն դրանից հետո բաժանեք առաջադրանքները**: Դպրոցի ծածկագիրը (այն կլինի նաև մրցութային փաթեթում) գրեք գրատախտակի վրա և խնդրեք երեխաներին այն ուշադիր արտագրել պատասխանների լրացման թերթիկի համապատասխան հատվածում: Բացի անուն-ազգանունից և դպրոցի ծածկագրից՝ պատասխանների լրացման թերթիկում երեխաները պետք է մուտքագրեն իրենց հերթական համարներն ըստ մասնակիցների վերջնական ցանկի, որն ուղարկվել է «Այբ»-ի կողմից մրցութային փաթեթի հետ: **ԵԹԵ ԴՊՐՈՑԻ ԾԱԾԿԱԳԻՐԸ ԵՎ ԵՐԵՆԱՅԻ ՀԵՐԹԱԿԱՆ ՀԱՄԱՐԸ (ԸՍՏ ՑԱՆԿԻ) ՉԵՆ ՆՇՎՈՒՄ, ԱՊԱ ՀԱՄԱԿԱՐԳԻՉԸ ՉԻ ՀԱՍԿԱՆԱ, ԹԵ ՈՒՄ Է ՊԱՏԿԱՆՈՒՄ ՏԿՅԱԼ ԱՇԽԱՏԱՆՔԸ**: Միայն այս ամենից հետո՝, բոլոր մասնակիցների ներկայությամբ, բացեք առաջադրանքների ծրարը և ըստ տարիքային խմբերի բաժանեք առաջադրանքների թերթիկները:



Առաջադրանքների թերթիկների (թեստերի) ծրարը բացվում է, և թերթիկները բաժանվում են միայն այն բանից հետո, որ բոլորը լրացրել են անհրաժեշտ տվյալները պատասխանների լրացման թերթիկներում: Այս պահից հաշվարկվում է մրցույթի ժամանակը՝ 75 րոպե:

- 3.16. Խորհուրդ տվեք մասնակիցներին երկար կանգ չառնել մեկ հարցի վրա, եթե դրան պատասխանել չի հաջողվում: Նպատակահարմար է անցնել հաջորդ հարցին, ապա վերջում վերադառնալ չլուծված առաջադրանքին:
- 3.17. Լուծելով առաջադրանքը՝ մասնակիցը «X»-ով նշում է («X» է դնում) տվյալ խնդրի համարին համապատասխանող սյունակում ընտրված պատասխանի վանդակը: **Պատասխանների թերթիկում ջնջում կամ որևէ նշում անելն արգելված է**: Երեխան ունի հնարավորություն՝ կատարելու **առավելագույնը 3 ուղղում**: Ուղղում անելու նպատակով **աշակերտը դիմում է պատասխանատուին, ով բացատրում է երեխային, թե ինչպես է դա արվում**: Ուղղումների համար պատասխանների լրացման թերթիկում նախատեսված է երեք լրացուցիչ դաշտ, որոնցում աշակերտը մուտքագրում է ուղղվող առաջադրանքի համարը և նշում ընտրված

պատասխանի տարբերակը: Եթե միևնույն առաջադրանքի համար երեխան պատասխանել է երկու տեղ՝ և՛ ընդհանուր, և՛ ուղղումների դաշտում, ապա որպես **վերջնական պատասխան ընդունվում է ուղղումների** դաշտում նշվածը:

3.18. Յուրաքանչյուր առաջադրանք ունի պատասխանի հնարավոր հինգ տարբերակ, որոնցից միայն մեկն է ճիշտ: Եթե պատասխանների լրացման թերթիկում որևէ առաջադրանքի համար երեխան նշում չի անում կամ նշում է մեկից ավելի պատասխան, ապա առաջադրանքը համարվում է չլուծված:

3.19. Սկսվելուց ուղիղ 75 րոպե հետո մրցույթն ընդհատվում է, և պատասխանատուն հավաքում է պատասխանների լրացման թերթիկները: Թեստերը մնում են երեխաների մոտ: **Պատասխանների բոլոր թերթիկները և մասնակիցների վերջնական (ճշտված) ցանկերը անմիջապես փակվում են** համապատասխան ծրարի մեջ, որի վրա ստորագրում են պատասխանատուն, դպրոցից երկու դիտորդ, տնօրենը (կամ փոխտնօրենը), ընդհանուր թվով՝ 4 (չորս) հոգի, և կնքում դպրոցի կնիքով: Ծրարը **նույն օրը** դպրոցի պատասխանատուի կողմից հանձնվում է տարածքային կենտրոն **մինչև ժամը 17:00-ն**:

3.20. Հանձնվող ծրարի մեջ պարտադիր ներառել նաև մասնակիցների ցանկը: Ցանկը պետք է ճշգրտվի մրցույթի փաստացի մասնակիցների տվյալներին համապատասխան:



Մասնակիցների ցանկերը և պատասխանների թերթիկները դրվում են մեկ ծրարում ու փակվում: Ուստի խստորեն խորհուրդ է տրվում ճշգրտել ցանկերը ոչ թե մրցույթի ավարտից հետո, այլ ընթացքում:

3.21. Միավորված դպրոցները զետեղում են պատասխանների թերթիկներն ու մասնակիցների ցանկերը մեկ ընդհանուր ծրարում:

3.22. Մրցույթի ավարտին **լրացվում է արձանագրությունը**, որը փակցված է պատասխանների լրացված թերթիկների համար նախատեսված ծրարի վրա:

4. Արդյունքների ամփոփում

4.1. Բոլոր մասնակիցների աշխատանքները տարածքային կենտրոններից ուղարկվում են «Այբ» կրթական հիմնադրամի գրասենյակ, որտեղ և իրականացվում է ստուգումը: Պատասխանների բոլոր թերթիկները մշակվում են տեսածրիչի (սկաներ) միջոցով և մուտքագրվում համակարգիչ, ապա հատուկ համակարգչային ծրագիրն իրականացնում է ստուգումը: Ստուգման արդյունքում ձևավորվում են ընդհանուր ցուցակներ՝ ըստ տարիքային խմբերի: Այդ ցուցակների հիման վրա կազմվում են հաշվետվություններ, որոնք հետագայում ուղարկվում են մասնակից դպրոցներին: **Յուրաքանչյուր դպրոց ստանում է հաշվետվություն միայն իր արդյունքների մասին**: Բացի դրանից, յուրաքանչյուր մասնակից դպրոց ստանում է մասնակցության հավաստագիր:

4.2. Աշխատանքների ստուգումը տևում է առնվազն մեկ ամիս, որից հետո մոտ մեկ շաբաթվա ընթացքում կազմվում են հաշվետվությունները: **«Այբ»-ն իրավասու է հաշվի չառնելու այն աշխատանքները, որոնք ներկայացվել են հաստատված ժամկետից ուշ՝ առանց հիմնավոր պատճառի**:

4.3. Մրցույթի արդյունքների հավաստիությունն ու անկողմնակալությունը ապահովելու նպատակով և՛ «Այբ»-ը, և՛ դպրոցի պատասխանատուները վերահսկում են մրցույթի կանոնների պահպանումը:

4.4. Բազմաթիվ տարիների համաշխարհային փորձը հաստատում է, որ մրցույթի մասնակիցների ինքնուրույն աշխատելու դեպքում մասնակիցների տված պատասխանների (ինչպես ճիշտ, այնպես էլ սխալ) հաջորդականությունների ամբողջական համընկնում ծայրահեղ հազվադեպ է լինում: Օրինակ՝ եթե մրցույթին մասնակցել է 100 000 աշակերտ, ապա հնարավոր է ոչ ավելի, քան մեկ-երկու աշխատանքի համընկնում, որոնք պատկանում են տարբեր դպրոցներում

սովորող նույն տարիքային խմբի աշակերտներին, ովքեր թույլ են տվել միևնույն միայն մեկ սխալը: Երկու սխալի համընկման դեպքեր գրեթե չեն լինում, իսկ մեծ թվով սխալների համընկում գործնականորեն անհնար է: Հասկանալի է, որ որքան շատ են ընդհանուր սխալները, այնքան վստահ կարելի է պնդել, որ եղել են խախտումներ, այդ թվում արտագրումներ և հուշումներ:

4.5. Պատասխանների համակարգչային մշակումից հետո **կատարվում է տվյալ դպրոցի միևնույն տարիքային խմբի բոլոր աշխատանքների համադրում** համընկումների հայտնաբերման նպատակով: Արդյունքների ամփոփ ցանկերում համընկնող աշխատանքների կողքին կատարվում է «արտագրության կասկած» նշումը:

4.6. Վերահսկողության և վերլուծության արդյունքում մրցույթի կանոնների կոպիտ խախտումների բացահայտման դեպքում «Այբ»-ն **իրավասու է որակագրկել** (հանել մասնակիցների ցանկից կամ չեղյալ համարել առանց որևէ փոխհատուցման) ինչպես առանձին մասնակիցների, այնպես էլ ողջ դպրոցի բոլոր մասնակիցների կամ նրա որևէ տարիքային խմբի աշխատանքները: Աշխատանքների այսպիսի որակագրկման կամ կանոնների կոպիտ խախտման վերաբերյալ «Այբ»-ը նամակ-նախազգուշացում է ուղարկում տվյալ դպրոցին՝ խնդրելով ձեռնարկել բոլոր միջոցները՝ կանոնների խախտումներն ապագայում բացառելու նպատակով: Երկու տարի անընդմեջ նամակ-նախազգուշացում ստանալու դեպքում «Այբ»-ը ստիպված կլինի մեկ տարով չթույլատրել տվյալ դպրոցին մասնակցել մրցույթին:



Խստորեն խորհուրդ է տրվում գերծ մնալ մրցույթի անցկացման կանոնների որևէ խախտումից՝ հնարավորություն տալով երեխաներին ինքնուրույն փորձել իրենց ուժերը: Հիշեք, որ «բարի ցանկությունները» կարող են «արջի ծառայություն» մատուցել. չէ՞ որ ավելի լավ է իրական արդյունքներով ոգևորվել, քան որակագրկված լինել:

4.7. Մինչ արդյունքների հրապարակումը մրցույթի կազմակերպիչները պարտավոր են հանդիպել հաղթողների հետ՝ պարզելու վերջիններիս արդյունքների իսկությունը: Արդյունքների հավաստիության կասկածի կամ մեծաթիվ հաղթողներ և/կամ լավագույն արդյունք արձանագրած մրցանակակիրներ ունենալու դեպքերում «Այբ» կրթական հիմնադրամն իրավասու է մրցույթի հաղթողների (մրցանակակիրների) հետ անցկացնել լրացուցիչ մրցույթ (թեստավորում, հարցազրույց, հանդիպում)՝ վերջնական մրցանակակիրներին (հաղթողներին) որոշելու համար:

4.8. Բոլոր աշխատանքները պահվելու են «Այբ» գրասենյակում մինչև հաջորդ տարվա փետրվարի 27-ը: Մինչև այդ պահին ընդունվում են բողոքարկման հայտեր: Բողոքարկում կարող է իրականացնել միայն դպրոցը՝ այն դեպքում, եթե մասնակցի անունը չկա հաշվետվությունում, կամ եթե կասկածի տակ է դրվում ստուգման ճշտությունը: **Սուաջադրանքների բովանդակության և/կամ պատասխանների տարբերակների ճիշտ կամ սխալ լինելու վերաբերյալ բողոքներ չեն ընդունվում**, քանի որ առաջադրանքները և դրանց պատասխանների տարբերակները մշակվում և ընդունվում են «Մեղու» մրցույթի կազմակերպչի կողմից:

4.9. **Մասնակից դպրոցների արդյունքները չեն համեմատվում:** Մրցույթից մոտ երկու ամիս հետո բոլոր դպրոցներին ուղարկվում են արդյունքների ամփոփ հաշվետվությունները, որոնցում նշվում է երեխայի վաստակած միավորների թիվը և նրա զբաղեցրած տեղը դպրոցում, մարզում, Հայաստանում և Արցախում: Հիշեցնում ենք՝ դպրոցը ստանում է տեղեկատվություն միայն իր աշակերտների արդյունքների վերաբերյալ:

5. Մրցանակաբաշխություն

5.1. Բոլոր մասնակիցների, լավագույնների և հաղթողների մրցանակաբաշխությունը իրականացվում է մրցանակային ֆոնդից, որը ձևավորվում է մասնակցության վճարներից և հովանավորների միջոցներից: «Մեղու» զանգվածային մրցույթ է, և մրցանակաբաշխությունը

Նույնպես գանգվածային է լինում: Բոլորի համար նախատեսված են հավաստագրեր ու փոքրիկ հուշանվերներ: Բոլոր մրցանակակիրները ստանում են խրախուսական մրցանակներ, լավագույններին շնորհվում են նաև պատվոգրեր, իսկ մրցույթի հաղթողները ստանում են գլխավոր մրցանակ: Բոլոր մասնակից դպրոցները ստանում են մասնակցության հավաստագրեր:

5.2. Հաղթողները որոշվում են տվյալ տարվա բոլոր մասնակիցների արդյունքների ընդհանուր հաշվետվության արդյունքում: Գլխավոր մրցանակը սահմանում է «Այբ» կրթական հիմնադրամը՝ կախված տվյալ տարվա ընդհանուր արդյունքներից և հաղթողների թվից:

6. Մասնակցության վճար

6.1. Մրցույթի մասնակցության վճարը կազմում է 970 ՀՀ դրամ: Այդ գումարներն օգտագործվում են բացառապես կազմակերպչական աշխատանքների և մրցանակների համար:

6.2. Մասնակցել ցանկացողները վճարումները կատարում են Հայաստանում՝ «ՎՏԲ-Հայաստան» բանկում բացված 16044015767700 հաշվեհամարին, իսկ Արցախում՝ «Արցախբանկ» ՓԲԸ-ում բացված 223171002460 հաշվեհամարին, կամ «ԹԵԼ-ՍԵԼ» տերմինալների միջոցով: Վճարում անելիս հայտնել վճարման նպատակը, երեխայի անուն-ազգանուն-հայրանունը, դասարանը, դպրոցի անվանումն ու համայնքը: **Անդորրագրերը կարող են դուրս գրվել ինչպես մեկ կամ մի քանի երեխայի անունով, այնպես էլ՝ ըստ խմբային ցանկերի:**

6.3. Մրցույթին մասնակցելու համար բանկում վճարում անելը բավարար չէ. աշակերտը պետք է անպայման **գրանցված լինի իր դպրոցի մասնակիցների ցանկում:**

6.4. Եթե երեխան չի մասնակցել մրցույթին (չկա դպրոցի վերջնական ցանկում, կամ չկա պատասխանների թերթիկը), ապա նա կարող է հետ պահանջել մասնակցության վճարը՝ դիմելով «Այբ» կրթական հիմնադրամ մրցույթի օրվանից հաշված **մեկ ամսվա ընթացքում:** Գումարները կվերադարձվեն բացառապես երեխայի ծնողին՝ վերջինիս դիմումի հիման վրա: Նշված ժամկետից հետո գումարները չեն վերադարձվում:

7. Ժամանակացույց և քայլերի հաջորդականություն

7.1. Մրցույթին մասնակցելու փաթեթ-հրավերը ստանալուց հետո դպրոցները մինչև **մասնակցության հայտի ներկայացման վերջնաժամկետը** նախապատրաստվում են մրցույթին հետևյալ կերպ.

- նշանակում են դպրոցում մրցույթի պատասխանատուին և ընտրում դիտորդներին.
- դպրոցում փակցնում են տեղեկատվական պաստառը, իրազեկում երեխաներին մրցույթի և դրա անցկացման կարգի մասին.
- բազմացնում և երեխաներին բաժանում են բանկում վճարման կարգի հիշեցման թերթիկները, հիշեցնում նրանց վճարման անդորրագրերը դպրոց ներկայացնելու և դպրոցի ցանկում գրանցվելու վերջնաժամկետի մասին.
- հավաքում են երեխաներից վճարման անդորրագրերը և նրանց գրանցում «Մասնակիցների ցանկում» մինչև հայտարարված վերջնաժամկետը:
- «Մասնակիցների ցանկի» հատուկ ձևը բեռնում են www.meghu.am կայքից կամ, կապվելով «Այբ» կրթական հիմնադրամի հետ, ստանում էլփոստով: Ցանկը լրացվում է **բացառապես «Այբ»-ի տրամադրած Էլեկտրոնային նիշքում (file)**, .xls ձևաչափով, Sylfaen տառատեսակով (Unicode): Նիշքն անվանվում է հետևյալ կերպ՝ «դպրոցի ծածկագիր.xls» (օրինակ՝ 1234567.xls) և ուղարկվում meghu@ayb.am Էլեկտրոնային հասցեով մինչև հայտի ներկայացման վերջնաժամկետը:



Ինդրում ենք նկատի ունենալ, որ երեխաների վճարման անդորրագրերը դպրոց ներկայացնելու, դպրոցի ցանկում գրանցվելու վերջնաժամկետը և դպրոցի մասնակցության հայտը ներկայացնելու վերջնաժամկետը տարբեր ամսաթվեր են:

7.2. Մինչև հայտի ներկայացման վերջնաժամկետը դպրոցները փոստով պատվիրված նամակով ուղարկում են կամ բերում են «Այբ»-ի կենտրոնական գրասենյակ **հայտը**, որը ներառում է՝

- մրցույթի մասնակցության հայտի լրացված, ստորագրված և կնքված ձևը.
- «Մասնակիցների ցանկի» տպված տարբերակը. ցանկի էլեկտրոնային տարբերակը **պարտադիր ուղարկվում է meghu@ayb.am** էլիասցեին.
- յուրաքանչյուր երեխայի անունով դուրս գրված բանկային անդորրագրերի բնօրինակները կամ պատճենները:



Հայտը չներկայացնելու կամ ուշացնելու դեպքում դպրոցը **ՄՐՑՈՒՅՅԻՆ ՉԻ ՄԱՍՆԱԿՑՈՒՄ**: Հայտը հիմք է ծառայում դպրոցի մրցութային փաթեթը պատրաստելու համար:

7.3. Մրցույթի օրվա ժամանակացույց

- Դպրոցի պատասխանատուն առավոտյան տարածքային կենտրոնից վերցնում է մրցութային փաթեթը:
- 12:00–14:00 ժամանակահատվածում դպրոցը պատրաստ է լինում սկսելու մրցույթը. սրահը (սենյակը) պատրաստ է, երեխաները նստած են, դիտորդները գիտեն իրենց պարտականությունները:
- Երբ ամեն ինչ պատրաստ է, մրցույթը մեկնարկում է. բոլոր մասնակիցներին բաժանվում են պատասխանների լրացման թերթիկներն ու հուշանվերները և բացատրվում են կանոնները:
- Պատասխանատուն բացատրում է պատասխանների թերթիկի վրա անձնական տվյալների լրացման կարգը և հետևում, որ բոլոր երեխաները լրացնեն դրանք: Պատասխանատուն երեխաներին հայտնում է դպրոցի ծածկագիրը և յուրաքանչյուրի հերթական համարը՝ ըստ մրցութային փաթեթում ներառված «Մասնակիցների ցանկի»:
- Անձնական տվյալները գրանցելուց հետո՝ միայն, **մասնակիցների ներկայությամբ, բացվում է առաջադրանքներով ծրարը**, և առաջադրանքների տարբերակները բաժանվում են երեխաներին: Այս պահից հաշվարկվում է մրցույթի ժամանակը՝ 75 րոպե:
- Ժամանակի լրանալուց հետո հավաքվում են պատասխանների լրացված թերթիկները և մասնակիցների ցանկերի հետ միասին անմիջապես դրվում համապատասխան ծրարի մեջ, փակվում և կնքվում:
- Կազմվում է պատասխանների թերթիկների ծրարի վրա փակցված արձանագրությունը: Ծրարը **նույն օրը հանձնվում է տարածքային կենտրոն մինչև ժամը 17:00-ն**:

7.4. Մրցույթից մոտ երկու ամիս հետո դպրոցին ուղարկվում է իր աշակերտների արդյունքների հաշվետվությունը: Դրանից հետո տեղի են ունենում մրցանակաբաշխության արարողությունները, որի մանրամասները լրացուցիչ հայտարարվում են:

7.5. Բողոքարկումների դիմումները (ներկայացվում են դպրոցներից) ընդունվում են «Այբ» կրթական հիմնադրամում մինչև հաջորդ տարվա փետրվարի 27-ը:



🏠 ք. Երևան 0009, Կոյունի 19ա, 9-րդ հարկ
☎ (010) 54-37-07, (093) 01-08-63,
✉ Էլփոստ՝ meghu@ayb.am